

BANTUAN YAYASAN ANTARABANGSA SINGAPURA (SIF) DI KEMBOJA

Fasa ke-3 projek 'Air Untuk Kehidupan' di Kemboja dilancar

Usaha ini telah bantu lebih 74,000 penduduk nikmati kemudahan air bersih

► **CHAIRUL FAHMY HUSSAINI**
chairul@sph.com.sg

YAYASAN Antarabangsa Singapura (SIF) telah melancarkan fasa ketiga projek utamanya, Air Untuk Kehidupan (WFL), di Siem Reap, Kemboja, baru-baru ini.

Menerusi projek ini, Sukarelawan Antarabangsa Singapura (SIV) telah memasang penapis air bio-pasir (bio-sand water filter) dan menjalankan kelas bimbingan tentang kebersihan untuk murid-murid sekolah di daerah Sotr Nikom dan Chi Kraeng, Siem Reap.

Menurut SIF dalam kenyataannya, Fasa ke-3 WFL (Siem Reap) menyaksikan kehadiran semula sukarelawan untuk program khidmat masyarakat di luar negara SIF (SIV) selepas langkah sekatan perjalanan bagi membendung penularan Covid-19 ditadakan.

Untuk dua tahun mendatang, seramai 160 sukarelawan SIV dijangka memasang 600 alat tapisan air bio-pasir dan menjalankan kelas bimbingan asas kebersihan untuk penduduk kampung dan murid-murid sekolah.

Menerusi kerjasama dengan badan Water for Cambodia, dan ditaja oleh Ngee Ann Development Pte

Ltd, fasa projek ini bertujuan menyediakan kemudahan air bersih untuk lebih 5,700 orang kampung di dua daerah itu.

Dalam kenyataannya kepada *Berita Harian*, Gabenor SIF, Encik Lian Wee Cheow, berkata pihaknya gembira dapat kembali ke Siem Reap sekali lagi selepas kali pertama melancarkan projek WFL 12 tahun lalu.

"Sejak bertahun-tahun, kami telah mempertingkatkan akses kepada bekalan air bersih dan menyediakan pendidikan tentang amalan kebersihan bersama-sama dengan rakan-rakan Kemboja kami.

"Kami berharap dapat meneruskan usahasama ini bagi membawa perbezaan bermakna kepada kesihatan dan kebersihan masyarakat Kemboja di pendalaman," katanya.

Projek yang kali pertama dilancarkan pada 2010 di Siem Reap, dan di Kampong Speu pada 2012, WFL kini telah memanfaatkan lebih 74,000 orang kampung di Kemboja.

Sejauh ini, seramai 1,210 sukarelawan dari Singapura telah memasang lebih daripada 5,300 tapisan air bio-pasir.

Penerima faedah ini menyatakan adanya peningkatan dalam kesihatan dengan penurunan 85 peratus ba-

gi kes penyakit berpunca daripada air.

Ketika ini, hampir 2.5 juta orang di kawasan pendalaman Kemboja masih berdepan dengan kesukaran mendapatkan bekalan air bersih.

Menurut laporan di Kemboja, kebanyakan kanak-kanak dalam masyarakat ulu didapati tidak mendapat makanan seimbang disebabkan penyakit berpunca daripada air seperti cirit-birit dan jangkitan parasit dalam usus.

Kajian mendapati tapisan bio-pasir dapat mengurangkan lebih 90 peratus bakteria buruk dan hampir 100 peratus parasit dalam air yang tercemar.

Kebersihan diri juga penting dalam memerangi penyakit seperti yang ditonjolkan dalam usaha mengekang penularan pandemik Covid-19.

Disebabkan itu, pihak SIF, menerusi WFL berharap dapat meningkatkan keadaan kesihatan dan kebersihan diri masyarakat ulu menerusi penglibatan dalam projek ini.

Menurut pertubuhan setempat itu lagi, WFL menyumbang kepada matlamat kerajaan Kemboja dalam menyediakan kemudahan mendapat bekalan air bersih dan sekitaran hidup yang bersih untuk setiap rakyatnya menjelang 2025.



RAKAMAN KENANGAN: Antara yang hadir pada pelancaran fasa ke-3 Program Air Untuk Kehidupan (WFL) di Siem Reap termasuk (barisan belakang, 10 dari kiri) Timbalan Gabenor Wilayah Siem Reap, Encik Neak Neron; Pengarah Operasi, Water for Cambodia, Encik Massimo Maio; Duta Besar Singapura ke Kemboja, Cik Teo Lay Cheng; Gabenor SIF, Encik Lian Wee Cheow; dan Pengarah Jabatan Pembangunan Wilayah Pendalaman, Encik Touch Maia. – Foto SIF

"Sejak bertahun-tahun, kami telah mempertingkatkan akses kepada bekalan air bersih dan menyediakan pendidikan tentang amalan kebersihan bersama-sama dengan rakan-rakan Kemboja kami.

Kami berharap dapat meneruskan usahasama ini bagi membawa perbezaan bermakna kepada kesihatan dan kebersihan masyarakat Kemboja di pendalaman."

– Gabenor Yayasan Antarabangsa Singapura (SIF), Encik Lian Wee Cheow.

Di peringkat global, WFL dilihat sejajar dengan Matlamat ke-6 Pembangunan Mampuan Pertubuhan Bangsa-Bangsa Bersatu (PBB), yakni menyediakan akses bekalan air bersih dan sanitasi menjelang 2030.

Pengarah Operasi, Water for Cambodia, Encik Massimo Maio, berkata ini merupakan kerjasama kali ketiga antara pihaknya dengan SIF untuk projek WFL.

"Ia melengkapkan matlamat kami dalam menyediakan air bersih dan bebas penyakit selain pendidikan asas kebersihan untuk rakyat Kemboja.

"Kami mengharapkan satu lagi kejayaan untuk langkah selanjutnya di Sotr Nikom dan Chi Kraeng dalam tempoh dua tahun mendatang," ujarnya.

Pengerusi Ngee Ann Development Pte Ltd, Encik Richard Lee, pula berkata: "Dengan akses kepada air bersih, ia memberi kesihatan lebih baik dan mempertingkatkan mutu kehidupan. Ngee Ann Development Pte Ltd gembira dapat memberi sokongan kepada projek WFL ini untuk 12 tahun dan melihat hasilnya yang baik."